

- मुख्यमंत्री भजनलाल शर्मा मौजूदा राज्य सरकार रा डोढ़ साल ने पैली वाळी कांग्रेस सरकार रा पांच साल रा कार्यकाल माथे भारी बतायों
- गृहमंत्री अमित शाह घणी बिरखा रा हालात वाळा राजस्थान समेत पांच राज्यां रा मुख्यमंत्रियां सागे बात कर र हर संभव मदद रो भरोसो दिरायों
- सहकारी समितियां रा काम-काज मांय और साफगोई लावण अर वां ने असरदार बणावण सारु नुवो को-ऑपरेटिव कोड बणायो जावेलं
- सड़क परिवहन राज्य मंत्री अजय टम्टा घणा हादसां री शंका वाळी ठौड़ा-ब्लेक स्पोर्ट्स री पिछाण री जरूरत माथे जोर दीनों

000

मुख्यमंत्री भजनलाल शर्मा कह्यो है के वां रा राज रो डोढ़ साल राज्य रा लारला कांग्रेस राज माथे भारी हैं वे आज खेरथल-तिजारा जिला रा असलीनपुर मांय व्ही जनसभा मांय बोल रह्या हां मुख्यमंत्री कह्यो के राज्य सरकार समाज रा आखिरी छोर रा लोगां री विकास मांय भागीदारी तैय करण माथे खास ध्यान दे रही हैं वे कह्यो के सरकार गरीबी मुक्त गांव योजना सारु ई नी कीनी है, बल्कि ई योजना सारु तीन सौ करोड़ रुपया रो बजट ई राख्यो हैं

.....

मुख्यमंत्री प्रदेश री लारली कांग्रेस सरकार माथे बजरी माफिया री हिमायत करण रो आरोप माण्ड्यों वे कह्यो के मौजूदा सरकार विकास ने नुवी दिशा दे र आमदनी बधावण रो काम कीनो हैं

.....

मुख्यमंत्री खेरथल-तिजारा जिला मांय पंडित दीनदयाल उपाध्याय अंत्योदय संबल पखवाड़ा रा तैत लगायी ज्या शिविर रो जायजो लीनों

ई पाछे वे बानसूर रा गिरुड़ मांय लगायी ज्या शिविर रो दौरा ई कीनो अर जनसभा ने सम्बोधित कीनीं दूजी कानी राज्य रा पैली वाळा मुख्यमंत्री अशोक गहलोत जोधपुर मांय खबरनवीसां सागे बातचीत करता थकां कह्यो के पांच साल बनाम डोढ़ साल री तुलना रो मुद्दो बेबुनियाद हैं

.....

000

गृहमंत्री अमित शाह आज राजस्थान, गुजरात, हिमाचल प्रदेश, उत्तराखंड अर छत्तीसगढ़ मांय व्हे रही जोरदार बरसात ने ध्यान राखता थकां आं राज्यां रा मुख्यमंत्रियां सागे बातचीत कीनीं श्री शाह सोशल मीडिया पोस्ट रे जरिये कह्यो के आं राज्यां मांय जरूरी तादाद मांय राष्ट्रीय आपदा मोचन बल-एनडीआरएफ री टीमां तैनात करी ज्यी है अर जरूरत पड़्यां और टीमां भेजी जावेलं

000

प्रदेश मांय व्हे री चौमासा री बिरखा ऊं नदी-नाळां मांय लगातार पाणी आ रह्यो हैं लारला 24 घंटां मांय जालौर, झुंझुनूं, डूंगरपुर, टोंक अर राजधानी जयपुर समेत केई ठौड़ां हल्की ऊं मझला दर्जा री बरसात दर्ज करी ज्यीं प्रदेश रा आतूणी हलका मांय कठे-कठे जोरदार मेह बरस्यो जैसलमेर जिला रा पोकरण मांय सब ऊं बत्ती 13 सेंटीमीटर बिरखा व्हीं ई बीचे, मौसम विभाग आज कोटा अर उदयपुर मांय कठे-कठे जोरदार बायरो बाजण सागे भारी ऊं घणी भारी बिरखा व्हेवण रा आसार जताया हैं कोटा, अजमेर, उदयपुर, जयपुर अर भरतपुर संभाग मांय आवता तीन-चार दिन चौखी बिरखा व्हेवण रा आसार हैं

000

संसदीय कार्य मंत्री जोगाराम पटेल आज जोधपुर मांय जणसुणवाई कीनीं वे अहलकारां ने जनता अर हलका री समस्यावां सुलझावण सारु गंभीरता ऊं काम करता थकां जरूरी कार्यवाही करण रा हुकम दीनां श्री पटेल विभागीय स्तर माथे जन समस्यावां रा निपटारा री पहल करण बाबत् ई कह्यो वे जोधपुर विकास प्राधिकरण री रहवास ऊं जुडी न्यारी-न्यारी योजनावां रा प्लॉटां री लॉटरी ई निकालीं ई मौके वे कह्यो के लॉटरी प्रक्रिया मांय पूरी साफगोई राख्यी ज्यी हैं

000

सहकारिता विभाग सहकारी समितियां रा काम मांय और साफगोई लावण अर जवाबदेह बणावण सारू नुवा को-ऑपरेटिव कोड माथे काम कर रही हैं सहकारिता विभाग री प्रमुख शासन सचिव मंजू राजपाल आज आकाशवाणी समाचार जयपुर सागे खास बातचीत मांय बतायो के इण ऊं सहकारी समितियां रो कामकाज और असरदार बण सकेलां

000

मुख्य निर्वाचन अधिकारी नवीन महाजन आज मतदान केन्द्रां रा हालात अर वोटर लिस्टां रा पुनरीक्षण रा काम रो आज जायजो लीनीं वीडियो कांफ्रेंसिंग रे मार्फत अहलकारां सागे मीटिंग मांय वे रीता ओहदा माथे बूथ लेवल अहलकारां री बेगी नियुक्ति अर संभावित नुवा मतदान केन्द्रां सारू बी.एल.ओ. री नियुक्ति री प्रक्रिया सुरू करण रा हुकम दीनां श्री महाजन वोटर लिस्टां मांय नाम जुड़ावण, हटावण अर वां मांय बदलाव ऊं जुड़ी जाणकारी रा प्रचार-प्रसार सारू सोशल मीडिया ने असरदार तरीका ऊं काम लेवण रा ई हुकम दीनां

000

सड़क परिवहन अर राजमार्ग राज्य मंत्री अजय टम्टा देश मांय सड़क हादसां री बत्ती आशंका वाळा ब्लैक स्पॉट री पिछाण करण री जरूरत माथे ज़ोर दीनो हैं वे आज नई दिल्ली मांय सड़क सुरक्षा अर नवाचार कार्यक्रम मांय बोल रह्या हां वे कह्यो के तांई सड़क हादसां रे कारण व्हेवण वाळी मौतां मांय साल 2030 तांई कमी लावण माथे सरकार रो खास ध्यान हैं

000

केन्द्र सरकार आवता साल हज सारू जावण बाबत् अर्जियां एक सप्ताह मांय लेवणो सुरू कर देवेलां अल्पसंख्यक कार्य मंत्री किरेन रिजिजू आज नई दिल्ली मांय व्ही हज समीक्षा बैठक मांय आ जाणकारी दीनीं वे ई सारू अर्जी देवण वाळां ने तय मियाद मांय फॉर्म जमा करावण बाबत् कह्यो

000

राष्ट्रपति ट्रौपदी मुर्मू आज नई दिल्ली मांय डूरंड कप फुटबॉल टूर्नामेंट 2025 री ट्रॉफियां रो अनावरण कीनीं ई मौके राष्ट्रपति कह्यो के खेलां ऊं अनुशासन, पक्का इरादा अर टीम भावना रो विकास व्हे हैं वे कह्यो के खेलां मांय लोगां, धर्मा अर देशां ने एकजुट करण रो अनोखो बूतो व्हे हैं वे कह्यो के देश मांय फुटबॉल ने पसंद करण वाळा लाखां लोग है अर ओ केवल खेल नहीं बल्कि जुनून हैं

.....

राष्ट्रपति डूरंड कप होड़ ने आगे बधावण मांय सशस्त्र बलां रा काम री सराहवणा कीनीं ई टूर्नामेंट रा मुकाबला 23 जुलाई ऊं 23 अगस्त तांई पांच राज्यां री आठ ठौड़ां खेल्या जावेलां

000

जयपुर ज्वेलर्स एसोसिएशन रो शो-जस-2025 आज जयपुर मांय सुरू व्ह्यो उपमुख्यमंत्री दिया कुमारी तीन दिन चालण वाळा ई शो रो उद्घान कीनीं ई मौके उपमुख्यमंत्री कह्यो के जयपुर रो रत्नां रो कारोबार दुनिया रा लेवल रो मंच बण ग्यो है जो मोटी तादाद मांय लोगां ने नौकरी धंधा रा मौका मुहैया कर रह्यो हैं दिया कुमारी कह्यो के रत्न अर गहणा रो कारोबार राजस्थान री विरासत अर कलात्मकता री निशाणी हैं वे कह्यो के ओ माली व्यवस्था रो मजबूत खम्भो ई हैं उपमुख्यमंत्री कह्यो के ई आयोजन ऊं प्रदेश रा नौजवानां, रत्न कारोबारियां अर कुशल कारीगरां ने नुवा मौका मिलेलां शो मांय देशभर ऊं आया रत्न कारोबारियां कानी ऊं लगायी ज्या तीन सौ ऊं बत्ता बूथां माथे रत्न अर गहणा रो दरसाव करी ज्यो हैं

000

सामाजिक न्याय अर अधिकारिता विभाग रा तहत जयपुर मांय सांगानेर रा राज्य महिला सदन मांय आज सामूहिक विवाह सम्मेलन राख्यी ज्यो इण मांय 11 आवासनियां रो ब्याह करायी ज्यो मुख्यमंत्री भजन लाल शर्मा ई सामूहिक विवाह सम्मेलन मांय सिरकत कीनीं ई मौके वे कह्यो के सामूहिक विवाह सम्मेलन समाज ने सकारात्मक दिशा देवे हैं मुख्यमंत्री कह्यो के ओ सम्मेलन वां रा राज मांय सामाजिक समावेशन अर महिलावां ने मजबूत बणावण री प्रतिबद्धता री निशाणी हैं

000

पुलिस महानिदेशक राजीव कुमार शर्मा आज राज्यपाल हरिभाऊ बागडे सागे मुलाकात कीनीं हाल ही डीजीपी ओहदा रो काम-काज संभाळ्यां पाछे राज्यपाल सागे वां री आ पहली मुलाकात हीं

000

नेशनल टेस्टिंग एजेंसी-एनटीए कॉमन यूनिवर्सिटी एंट्रेंस टेस्ट-सीयूईटी 2025 रा नतीजा रो ऐलाण कर दीनो हैं आ परीक्षा देश रा न्यारा-न्यारा केंद्रीय विश्वविद्यालयां अर दूजा शिक्षण संस्थानां मांय स्नातक अर स्नातकोत्तर कोर्स मांय दाखिला सारू ली जावे हैं

000